

POBREZA: ESTILU IDA MORIS KONTENTE HO BUAT NATOON ORIENTA BA EFIKÁSIA EDUKATIVA

Ha'u-nia reflesaun sei tau nu'udar *background* artigu 23 Konstituisaun nian.

“Hodi tau iha neon

Don Bosco no Madre Mazzarello

nia hanorin,

ita sei moris simples no esensiál

tuir stilu salezianu, temperansa,

ksolok no simplisidade...”

Pobreza: stilu ida moris simples nian

La'ós fasil atu hatene ho modu konkretu saida mak ema ida-idak bele halo ho maneira signifkativa/di'ak liu, ho domin no entuziazmu, atu hadi'ak mundu ohin lora nian, ita-nia mundu ida-ne'e. Halo pergunta ida-ne'e ajuda atu komprende dimensaun lubuk ida mai husi prosesu ida refundasaun nian no hatudu diresaun ida-ne'ebé tenke foti. Ha'u-nia resposta, ne'ebé karakteriza ho sentidu urjénsia no radikalidade, mak proposta ida atu moris no hatene apresenta stilu ida no paradigma ida moris simples nian ne'ebé konvense no dada liuliu foin-sa'e sira no halo ita-nia asaun edukativa sai kredível.

Simplisidade auténtika mak soin ida ne'ebé susar atu hetan iha sosiedade supérflua no labele komprende iha sosiedade mamukit nia laran. Ha'u fiar katak la'o iha diresaun ida-ne'e hakarak hateten orienta an ba esensiál nu'udar buat ne'ebé envolve liu ita no iha tempu hanesan komplika ita-nia moris. Ida-ne'etak atitude esensiál: ne'e hatudu loloos iha istória refundasaun nian ne'ebé hala'o hodi asume pobreza ho hakarak rasik, hodi moris ho buat ne'ebé indispensavel.

Iha fraze ida ne'ebé famozu: «*Riku sira tenke moris simples liután atu ki'ak sira bele simplesmente moris netik*». (Os ricos devem viver mais simplesmente, porque os pobres possam simplesmente viver).

Ita-nia simplisidade tenke sai nu'udar liafuan di'ak, Evanjellu puru, vida saudável no futuro klaru, iha lia loos no ár fresku. Simplisidade mak forma ida moris nian nu'udar alternativa ba ida naran konsumista; sai husi “*smog*” ne'ebé hafo'er no respira ár moos. Ne'e duni importante tebes atu akompaña simplisidade ho lialoos, beleza, laran-di'ak, laran kontente no ksolok. Forma moris nian ida-ne'e tenke hafanun hakaran atu koñese no moris tuir. Evanjellu, ne'ebé konvida ba simplisidade, mak proposta ba moris no festa.

Simplisidade lori ita ba relasaun ho Jezús, halo nia la'ós nu'udar prinsipiu asétiku ida, maibé nu'udar espresaun fiar no laran-metin nian ba Aman Maromak.

Magnifikat halo ita iha sentimentu ida-ne'e no haree orizonte hanesan; hori rona no reza nia, ita sente liuliu dezeju atu apresia feto ida ne'ebé sai livre no haksolok ninia grandeza liu-fali halakon opresaun.

Oinsá ita bele vizualiza servisu komún no signifkativu ida iha milénio datoluk ninia inísiu? Oinsá koloka servisu ida-ne'e iha **ne'e**? Ida-ne'e mak forma ida moris nian no sasin ida ne'ebé presiza fó nafatin bainhira eziyénsia apostoladu auténtiku ida husu iha Nasaun ho rekursu barak ka iha grupu ida ho rekursu uitoan: sirkunstánsia sira-ne'e hotu husu atu hala'o purifikasaun ba motivasaun sira ne'ebé dudu ita: liberaun adekuada husi osan no poder, hilin simplisidade nian iha hahán, hatais no meu transporte nian, instrumentu servisu nian.

Ita-nia liafuan sei laiha efikásia edukativa ida se simplisidade no esensialidade iha moris pesoál no komunitária la sai nu'udar sasin ka apoiu ba doutrina ne'ebé ita haklaken.

SIMPLISIDADE IMPLIKA HO BUAT NE'EBÉ NATOON ATU MORIS

Adjetivu 4 define no valoriza ita-nia relasaun ho buat ne'ebé ita iha no ita hanoin, no mós ho buat ne'ebé ita halo no ita nia identidade; tulun atu hatudu simplisidade ne'ebé auténtika.

Supérfluu. – Ita iha buat barak naresin no ita halo despeza supérflua. Supérfluu la’ós oportunu no nesesáriu, maibé, halo liu, luxu ida; demais. Iha demais no dala barak halo aat.

Oportunu. – Ita iha sasán oportunu. Sasán util ba ita-nia servisu, ita-nia alimentasaun, ita-nia deskansu no ita-nia saúde. Kampu sasán oportunu nian movimenta entre nesesáriu no supérfluu.

Ha’u-nia an, knaar ne’ebé ha’u hala’o, ha’u-nia formasaun bele halo atu sasán sira ne’ebé ha’u iha ka meu sira ne’ebé iha no ha’u uza sai oportunu. Ida-ne’e kampu ida ne’ebé ladún fasil atu define. Maibé ita presiza hanoin hetan buat rua: ita-nia misaun nia *efikásia* no *autentisidade* la depende ba rikusoin no meu loloos ne’ebé iha, no buat seluk tan mak ita tenke hanoin katak ita labele iha finalidade lukru nian.

Nesesáriu. – Iha sasán ruma ne’ebé nesesáriu. Ida ne’e liu-fali oportunu atu iha hanesan baibain dehan, la sai kiak liu ema ne’ebé iha menus liu, maibé ema ne’ebé mak nafatin iha hakarak atu iha, kaan nafatin no la tau limite ba nesesáriu.

Keta haluha katak ita tenke iha de’it buat ne’ebé nesesáriu ka loos duni presiza.

Indispensavel. – Iha sasán balun ne’ebé indispensavel, katak tenke iha duni.

Simplisidade ida-ne’e la’ós kona-ba oinsá hatais ka han, ka kona-ba osan ne’ebé ita iha.

Nia baze mak buat ruma husi laran no sai nu’udar fundamentu, valór partikulár ida ne’ebé hatudu liuhusi liafuan, jestu no desizaun ida-idak. *Buat ruma ne’ebé labele subar tanba ema hotu haree.*

Simplisidade evanjélica

Konvite ba simplisidade representa novidade ida husi Evanjellu. Simplisidade moris nian buras husi solidariedade, husi kontemplasaun natureza nian no husi grasa ne’ebé kura atu lori hikis buat hotu ba Kristu ita bele hetan iha pájina hotu Evanjellu nian. Hola-parte iha movimentu ida espiritualidade nian no haka’as an nian atu sai fiel ba eziyéncia sira simplisidade nian eziye atu ita fila fali ba Evanjellu.

Estímulu ruma.

Kona-ba simplisidade evanjélica, Jezús mak ilas/íkone perfeita. Sira ne’ebé hakbesik ba Jezús, ninia espíritu hada’et ba sira no simu nu’udar grasa presente simplisidade nian. Iha Evanjellu ita aprende katak sai kiak la’ós virtude nein karizma ida, maibé falta ida ka defisiénsia ida. Buat ne’ebé virtude mak laran-luak, kompaixaun, solidariedade, liberdade, rekoñese katak di’ak hotu nia hun no nia plenitude mak Maromak.

Iha uitoan atu sai ema liután

Iha V.C., durante sékulu barak, eziste nafatin tradisaun saudável ida kona-ba simplisidade, iha ne’ebé nia signifikadu katak “iha uitoan” mak “iha barak liután”, katak iha uitoan signifika sai ema liután. Iha tempu uluk, relijiozu sira nafatin hetan kbiit espírituál boot, kreativitu no komuñau nian husi simplisidade.

- Figura Maria nian fó inspirasaun ba institutu relijiozu barak atu moris iha simplisidade. Frazee evanjélica barak ne’ebé uza iha espiritualidade mariana tulun atu evita moris iha auto-satisfasaun no hamamuk ita husi ita-nia an rasik.

- Espiritualidade V.C. ne’ebé loos tau nu’udar fundamentu katak vida espíritu nian hilin ida no renúnsia ida; Sira ne’ebé laiha buat ida atu proteje ka defende mak bele hetan liberdade espíritu nian no bele hakohak Kristu iha sira-nia moris. Sira ne’ebé iha buat hotu ka buat barak, la presiza ema seluk. Konsagradu sira-nia moris iha simplisidade no pobreza representa modu ida oin sá sai ema ne’ebé halo atu buat sira ne’ebé sira iha la possui sira.

-Iha movimentu forte istória V.C. nian ema bá oin ho aten barani no kbiit ne’ebé mai husi moris loloos simplisidade ida-ne’e. Ho nia ita bá to’o esensiál no hatene haketak an husi buat ne’ebé la vale no husi buat ne’ebé dadur ita no kesi metin ita.

RESPOSTA URJENTE IDA

Hilin simplisidade nian tenke define fatin sira prezensa FMA nian, define ninia modu atu halo no define

se mak destinatáriu sira misaun nian. Konsumizmu nia gravidade halo atu problema ida-ne'e sai prioridade iha humanidade, ba ninia importánsia no ba ninia urjénsia, no preokupa mane no feto barak ne'ebé iha sensibilidade kle'an. Ita mós tenke sente problema ida-ne'e iha ita-nia an rasik.

Ema nia nesesidade réal, husu solidariedade no sai bolun ida momoos ba moris simples. Bainhira ha'u fó, ha'u sente kmaan no sente di'ak liután, maibé liuliu halo atu ema seluk sente di'ak.

Simplisidade ezije nafatin moderasaun no austeridade ho an rasik; solidariedade ho ema seluk, laran-metin iha Maromak no liberdade neon-na'in no atensaun nian iha ita-nia relasaun ho natureza. Halo nune'e ita tama iha dimensaun hotu pobreza nian ne'ebé tulun atu hahú prosesu ida refundasaun nian.

Hilin simplisidade nian mak nia hun. Se hilin ne'e la iha ho modu significativu iha V.C., iha perigu atu ema lakon ninia dalan. Atitude ida-ne'e influensia dimensaun hotu ne'ebé ita temi ona; simplisidade fó "kór" ba buat hotu no halo nia sai ezijente. Ema ne'ebé moris iha simplisidade iha dignidade boot, nune'e mós se mak buka ka moris iha supérfluu moris ka tama iha perigu boot.

Simplisidade no solidariedade

Ita-nia comunidade sira mós,
sei nakloke ba Kreda nia presiza,
no sensitivu ba esperansa,
no buat ne'ebé ema kiak sira presiza
hodi sai solidáriu ho sira
hanesan Dom Bosco halo,
nia ne'ebé hadomi sira iha Kristu
koko sira nia susar no fo-an tomak
ba sira-nia evangelizasaun (Konst 26)

Simplisidade ezije solidariedade. Atu to'o iha estilu moris ne'ebé karateriza ho simplisidade tenke tau solidariedade iha sentru ita-nia moris nian no sosiedade nian.

Simplisidade mak laran-metin iha Providénsia

Modu oinsá uza buat ne'ebé ita possui, iha ninia valór iha ita-nia relasaun ho Maromak. Nia lori ita atu haree fila-fali ita-nia orasaun, sakramentu rekonsiliasaun no ita-nia hamulak no agradesimentu. Simplisidade evita atu ita halo osan nu'udar maromak ida ne'ebé bele fó buat hotu no halo ita sai atan; evita atu iha dezeju atu akumula no possui nune'e sente seguransa. S. Paulo fó hanoin mai ita katak kaan-teen mak «sala hotu nia abut» (1 Tm 6,10).

Ita la duvida katak, ba konsagradu barak, signifikadu réal pobreza evanjéliko nian la'ós pobreza fízika ka materiál, maibé konfiansa totál no dependénsia ba Maromak. Kristianizmu no relijiaun barak fó hanoin mai ita katak relijiaun nia esénsia mak refere buat hotu – konserteza soin sira – ba buat hotu nia hun, Maromak.

Nia mak ita-nia soin. Nune'e ita tama iha abut simplisidade nian: konfiansa tomak iha Maromak nia laran-di'ak. Ba ema balun soin mak bengan ida husi providénsia: sira hein husi Maromak buat ne'ebé sira presiza, hanesan fali katak buat hotu depende husi Aman Maromak nia providénsia, maibé servisu hanesan fali buat hotu depende ba sira no sira-nia haka'as an.

Simplisidade mak sabedouria

Iha relasaun ho sasán sira, simplisidade lori ita atu iha atitude ema matenek no livre nian. Rekursu sira mak instrumentu ida. Sasán sira util tanba serve "ba"; buka nia bainhira serve. Maibé, sasán bele haburas kaan-teen no, dala ruma kaan-teen ida ne'ebé nunka bosu.

Osan bolu osan seluk. Se ita buka osan atu iha osan, ida-ne'e modu ida atu akumula rikusoins, nune'e

hamutuk ho nia podér, no lakon liberdade. Tanba relasaun ho osan no soin sira tulun iha baburas umana no espirituál, importante liu atu nia sai nu'udar meu, "sasán" ida, instrumentu ida no, nu'udar instrumentu, nia serbí objetivu sira ho valór boot no finalidade a'as. Ema ne'ebé neon-na'in hatene estabeselese prioridade sira no hala'o ho responsabilidade.

Arranja sasán bainhira bele no uza «bainhira » (Inacio de Loyola) serve ba di'ak a'as liu. Buras iha simplisidade nu'udar estilu moris nian implika kapasidade atu estabeselese orden prioridade nian ba buat ne'ebé serve no bele arranja. La to'o atu afirma, tuir perspetiva sarani, katak sasán sira la'ós finalidade; presiza hatene uza ho modu adekua/loos iha moris loroloron no uza ho modu ida ne'ebé tulun no fó apoiu ba realidade ne'ebé importante duni.

Simplisidade ba FMA sira mak kritériu ida dixernimentu nian ba hilin auténtiku no tenke tau nafatin iha oin durante ita-nia prosesu desizaun nian. Atu tama iha prosesu ida-ne'e presiza argumentu no motivasaun loos, maibé la to'o.

Ita bele ko'alia ho ibun, maibé kuran iha hahalok. *Presiza tau iha prátika, tanba hodi hahalok de'it mak hatudu jénii simplisidade nian.* Ita bele dehan katak ita hatene buat ruma kona-ba simplisidade se ita nia hahalok hatudu moris simples. Se ba dezafiu ida-ne'e ita la fó resposta evanjélica ida ne'ebé radikál, vokasaun sarani sei lakon ninia razaun atu eziste. Maibé, se ba nia ita hatán ho Kristu nia profundidade no kbiit – no relijioza foin-sa'e balun – hein ida-ne'e, ita sei iha baburas no nafunan estraordinária iha fiar.

Ida-ne'e mak "konversaun ba simplisidade ", ne'ebé loos duni konversaun ba Evanjellu, ezije atu fila fali ba baze dahuluk espiritualidade evanjélica nian rasik. Iha ne'ebá de'it mak ita hetan enerjia espirituál indispensavel atu simu inspirasaun, ho Espíritu nia kbiit lansa ita nia moris iha dalan hafoun an nian ka refundasaun nian.

Nia de'it bele halo ita manán iha konfrontu hasoru forsa sira egoíзму nian, ne'ebé rede ida podér no akumulasaun nian organiza, no hadadur ema barak. Mundu presiza ho modu urjente sasin transparente no klaru ne'ebé hafanun nia no loke nia matan ba realidade atu bele haree problema ne'ebé loos no ninia solusaun únika.

Iha ne'e mak resposta nia parte boot ida ba pergunta hato'o iha leten: servisu di'ak liu ne'ebé FMA bele fó ba foin-sa'e sira mak sai sasin maka'as anti-konsumista nian, liuhusi vida simples, hodi apresenta ba sira, iha sira-nia an rasik, Evanjellu nia interpretaun auténtika no libertadora, ne'ebé foin-sa'e sira rasik hein hela maka'as husi ita.

Buat sira ne'e hotu sadik hela ita.

Ema ki'ak sira husu ba V.C., ba Kreda no ba Institutu FMA atu fó pauza ida iha sira-nia dalan no hanoin kona-ba buat ne'ebé akontese no kontinua akontese se la tau iha prátika hilin ida-ne'e. *Mamukit no marjinalizasaun, opresaun no kaan-teen mak realidade ne'ebé komplikadu; situasaun ne'e la bele rezolve ho ansi nein ho superfisialidade; presiza rezolve ho simplisidade no profundidade, ho solidariedade no lia-loos.*

Situasaun sira-ne'e ezije pasiénsia no domin ne'ebé intelijente atu deskobre nia pontu sentrá. Maski nune'e, la husik atu ita hakmatek de'it, tanba loos duni simplisidade troka buat barak, la'ós de'it troka buat barak, troka buat hotu.

Simplisidade halo ita sai laran-luak no fó mai ita modu foun ida atu sai laran-luak; tanba sai laran-luak la signifika fó hotu, maibé **fó hotu an tomak**, katak halo an rasik sai nu'udar prezente gratuitu ida ba foin-sa'e sira: no ida-ne'e mak karaterístika ida refundadór no profeta loos nian.

Dala barak ita sai vítima supérfluu nian. Ita loloos tenke sai sasin no manu-ain ba moris vida simples nian. Ida-ne'e mak arte ida no grasa ida.